

Cun instrucziun individualisanta

Promoziun dals differents duns dals uffants

■ **(anr/fa) En mintga classa da scola existan differenzas tar las capacitads dals uffants. Valischs da promoziun duessan dar a la magistraglia grischuna material ed ideas per als instruir tenor lur duns.** «En il sport èn differenzas da prestaziun fitg giavischadas», ha ditg *Dany Bazzell*, il manader da l'Uffizi chantunal per la scola populara ed il sport, mesemna a Cuira a chascun d'ina conferenza da pressa. La magistra u il magister nun ha tenor el nagina fadia cun questas differenzas. «En il sector cognitiv dentant è quai auter», ha'l cuntinuà, «qua èsi pli difficil per las personas d'instrucziun da promover ils singuls uffants tenor lur capacitads individualas.» Perquai aveva concepi il chantun Grischun da l'onn 2000 in pachet da mesiras: Cun quellas vulevan ins promover ils uffants dotads cun gronds duns. «Causa las mesiras da spargn decisas da la regenza e dal cussegl grond nun èsi pussaivel da realisar il center da promoziun en la Scola chantunala grischuna a Cuira», ha menziunà Bazzell, «perquai sa concentreschan uss las stentas da las personas partecipadas sin las mesiras da promoziun en la classa regulara.»

Infurmar ils geniturs e scolar ils magisters

«Noss concept sa basa sin trais

pitgas», ha declerà *Urs Grazioli*, l'incumbensà chantunal per la promoziun d'uffants talentads, «sensibilisar magistraglia e geniturs per la problematica, scolar las personas d'instrucziun e promover ils uffants en la classa regulara.» Cun artitgels en revistas spezialisadas e brochuras per las scolastas e scolasts han accumulà ils collavurats da l'uffizi per la scola populara l'emprima incumbensa. «Gia en la scolaziun a la Scol'auta pedagogica a Cuira vegnan preparadas las futuras personas d'instrucziun per ils basegns speziels d'uffants cun duns extraordinaris», ha'l cuntinuà. Ch'els hajan er purschi numerus curs da scolaziun supplementara ch'eran frequentads fitg bain, ha infurmà Grazioli. La finamira essenziala è tenor el «che magistras e magisters sajan en avegnir capavels da resguardar las differents capacitads dals uffants en lur classas». Per gidar la magistraglia a realisar mesiras individualisantas en lur instrucziun ha concepi e cumpilà l'uffizi per la scola populara differents valischs da promoziun.

Lingua, matematica, filosofia e ciencias natirals

«Cun questas valischs vulan ins metter a disposiziun als magisters different material d'instrucziun, il qual els pon utilizar

cun tut la classa, cun gruppas u er mo cun singuls scolars», ha declerà Urs Grazioli, «e la finamira è ch'els possian installar uscheditgs chantuns da resursas, nua ch'els scolars pon lavurar individualmain cun il material da promoziun.» Impurtant èsi sco ch'el ha ditg da resguardar che las valischs na sajan betg cumplettas. Ch'els spetgian da la magistraglia ina reacziun, «eventualmain ans pon els metter a disposiziun agen material, uschia ch'ins po permanentmain engrondir ed optimar las collecziuns da material en las valischs». Las valischs èn adattadas e repartidas tenor il stgalim dals uffants, ina per la 1. fin 3. e l'autra per la 4. fin 6. classa. Enfin uss existan valischs per ils roms lingua, matematica, filosofia e biologia/chemia/fisica. «Las differents valischs cuntengnan material da promoziun spezialmain adattà», ha explitgà il magister *Peter Flury*, il qual ha concepi las duas valischs da matematica, «ins chatta qua cudeschs, gieus attractivs, software e.u.v. sco er in manual per la persona d'instrucziun.» Il termin d'emprest dura tut tenor basegn 4 fin 8 emnas. Il diever è da princip gratuit. L'uffizi da scola vegn a metter a disposiziun a las scolas ina glista da quests materials.



Peter Flury, Urs Grazioli e Dany Bazzell (da san.) han preschentà las valischs da promoziun.